

Broj: 03-02-570/2025
Sarajevo, 13.05.2025. godine

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Dragan Mioković, predsjedavajući
- Dom naroda -
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa članom 172. stav (1) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i sa članom 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i usvajanja po skraćenom postupku, dostavljam Vam **PRIJEDLOG ZAKONA O IZMJENAMA I DOPUNAMA ZAKONA O PLAĆAMA I DRUGIM NAKNADAMA SUDIJA I TUŽILACA U FEDERACIJI BOSNE I HERCEGOVINE**, koji je utvrdila Vlada Federacije Bosne i Hercegovine na 54. sjednici, održanoj 12.05.2025. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



Prilog:

- Prijedlog zakona na bosanskom jeziku (CD)
- Odredbe zakona koje se mijenjaju i dopunjuju
- Izjava o usklađenosti
- Obrazac broj 2
- Obrazac broj 1a
- Obrazac IFP-NE
- Zakon o plaćama i drugim naknadama sudija i tužilaca u Federaciji Bosne i Hercegovine („Službene novine Federacije BiH“, br. 72/05, 22/09, 55/13, 102/13 i 61/22)

**Co: Federalno ministarstvo pravde
gosp. Vedran Škobić, ministar**

Co: pred-et

BOSNA I HERCEGOVINA
FEDERACIJA BOSNE I HERCEGOVINE
VLADA

PRIJEDLOG

ZAKON
O IZMJENAMA I DOPUNAMA ZAKONA O PLAĆAMA I DRUGIM
NAKNADAMA SUDIJA I TUŽILACA U FEDERACIJI BOSNE I
HERCEGOVINE

Sarajevo, maj 2025. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Postupajući u skladu s odredbama člana 26. Poslovnika o radu Vlade Federacije Bosne i Hercegovine – prečišćen tekst („Službene novine Federacije BiH“, br. 6/10, 37/10, 62/10, 39/20 i 67/21) predlaže se donošenje Zakona o izmjenama i dopunama Zakona o plaćama i drugim naknadama sudija i tužilaca u Federaciji Bosne i Hercegovine, po skraćenom postupku. Kao osnovni razlog za donošenje ovog zakona po skraćenom postupku ističemo da se u konkretnom slučaju radi o provedbi Odluke Ustavnog suda Bosne i Hercegovine o dopustivosti i meritumu broj: U-12/23 od 28.09.2023. godine, da se ne radi o složenom i obimnom zakonu, te da su u tom smislu ispunjeni uvjeti iz člana 172. stav (1) Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08, 26/20 i 13/24) i člana 164. stav (1) Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09, 24/20 i 60/24).

ZAKON
O IZMJENAMA I DOPUNAMA ZAKONA O PLAĆAMA I DRUGIM NAKNADAMA SUDIJA I
TUŽILACA U FEDERACIJI BOSNE I HERCEGOVINE

Član 1.

U Zakonu o plaćama i drugim naknadama sudija i tužilaca u Federaciji Bosne i Hercegovine („Službene novine Federacije BiH“, br. 72/05, 22/09, 55/13, 102/13 i 61/22) u članu 1. iza riječi „tužilaca“ dodaju se zarez i riječi: „stručnih sudske savjetnike u Vrhovnom sudu Federacije Bosne i Hercegovine i stručnih savjetnika u Federalnom tužilaštvu Federacije Bosne i Hercegovine“ (u daljem tekstu: stručni savjetnici).

Član 2.

Iza člana 3. dodaje se novi član 3a., koji glasi:

„Član 3a.
(Osnovna mjesečna plaća za stručne savjetnike)

- (1) Osnovna mjesečna plaća za stručne sudske savjetnike u Vrhovnom sudu Federacije Bosne i Hercegovine i stručne savjetnike u Federalnom tužilaštvu Federacije Bosne i Hercegovine je 2.496 KM.
- (2) Broj stručnih savjetnika iz stava (1) ovog člana određuje predsjednik Vrhovnog suda Federacije Bosne i Hercegovine i glavni tužilac Federalnog tužilaštva Federacije Bosne i Hercegovine, uz saglasnost federalnog ministra pravde.“

Član 3.

U članu 5. iza riječi „Zakona“ dodaju se zarez i riječi: „stručnog savjetnika iz člana 3a.“

Član 4.

U članu 6. stav (1) iza broja „3.“ dodaju se zarez i broj „3a.“

U stavu (2) iza riječi „tužilaca“, dodaju se zarez i riječi: „stručnih savjetnika iz člana 3a“.

U stavu (4) u prvoj i drugoj rečenici iza riječi „tužilaca“, dodaju se zarez i riječi: „stručnih savjetnika iz člana 3a“.

Član 5.

U čl. 6a., 6b., 6c. i 6d., članu 7. stav (1), članu 8. st. (1), (2), (3) i (5), članu 9. u uvodnoj rečenici, čl. 11., 12., 12a., 13., 13a., članu 13b. st. (1), (2), (3), (5) i (7), i čl. 14. i 15. iza riječi „tužilac“ u različitom padežu dodaju se zarez i riječi: „stručni savjetnik iz člana 3a.“ u odgovarajućem padežu.

Član 6.
Prelazna odredba

Usklađivanje osnovne mjesečne plaće iz člana 6. ovog zakona za stručne savjetnike iz člana 3a. ovog zakona početak će se izračunavati uz primjenu korekcije od naredne godine od stupanja na snagu ovog zakona, bez obračunavanja prethodnih akumulacija.

Član 7.
Stupanje na snagu zakona

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**OBRAZLOŽENJE PRIJEDLOGA
ZAKONA O IZMJENAMA I DOPUNAMA ZAKONA O PLAĆAMA I DRUGIM NAKNADAMA
SUDIJA I TUŽILACA U FEDERACIJI BIH**

I. USTAVNI OSNOV

Ustavnopravni osnov za donošenje ovog zakona sadržan je u odredbama člana IV. A. 20. (1) d) Ustava Federacije Bosne i Hercegovine, prema kojima je Parlament Federacije Bosne i Hercegovine nadležan za donošenje zakona o vršenju funkcije federalne vlasti.

II. RAZLOZI ZA DONOŠENJE ZAKONA

Ustavni sud Bosne i Hercegovine, odlučujući o zahtjevu Općinskog suda u Sarajevu za ocjenu ustavnosti člana 20. Zakona o plaćama i naknadama u organima vlasti Federacije BiH („Službene novine Federacije BiH“, br. 45/10, 111/12, 20/17, 22/19 i 94/20), donio je Odluku o dopustivosti i meritumu broj: U-12/23 od 28.09.2023. godine, kojom je utvrdio da član 20. Zakona o plaćama i naknadama u organima vlasti Federacije BiH, u dijelu IV. u alineji kojom je propisano „stručni sudski savjetnici u Vrhovnom sudu Federacije“, nije u skladu sa članom II/4. Ustava Bosne i Hercegovine, članom 1. Protokola broj 12 uz Evropsku konvenciju za zaštitu ljudskih prava i osnovnih sloboda i članom 26. Međunarodnog pakta o građanskim i političkim pravima.

Stručni sudski savjetnici Vrhovnog suda Federacije BiH prema osporenoj odredbi svrstani su u Zakon o plaćama i naknadama u organima vlasti Federacije BiH i slijedom toga njihova plaća se usklađuje s tim zakonom, kao i plaća za sve druge državne službenike. Ustavni sud Bosne i Hercegovine je zaključio da su stručni savjetnici u Vrhovnom sudu Federacije diskriminirani u odnosu na stručno osoblje koje je zaposleno u pravosudnim institucijama na nivou Bosne i Hercegovine zato što stručni savjetnici u Vrhovnom sudu za razliku od sudija Vrhovnog suda, stručnog osoblja u pravosudnim institucijama BiH i u odnosu na stručne saradnike u sudovima u Federaciji BiH, nemaju zakonom propisano pravo na usklađivanje plaća sa mjesečnim rastom prosječne plaće.

Ustavni sud je ispitujući postojanje diskriminacije kao adekvatnu „uporednu grupu“ i „analognu ili relevantno sličnu situaciju“ utvrdio da su pravni savjetnici Pravnog odjeljenja Ureda registrara Suda BiH adekvatna uporedna grupa u odnosu na stručne savjetnike u Vrhovnom sudu. Takođe, Ustavni sud je zaključio da postoji različit tretman između savjetnika u Vrhovnom sudu koji nemaju pravo na usklađivanje plaće kao što to imaju savjetnici Suda BiH, iako obavljaju slične poslove, te da za takav različit tretman ne postoji objektivno i razumno opravdanje.

Polazeći od navedenog, u cilju izvršenja Odluke Ustavnog suda BiH, broj U-12/23, pripremljen je Nacrt zakona o plaćama i drugim naknadama sudija i tužilaca u Federaciji BiH. Istovremeno, Prijedlogom zakona o izmjenama i dopunama su obuhvaćeni i stručni savjetnici u Federalnom tužilaštvu Federacije BiH, jer su u istoj pravnoj poziciji.

III. USKLAĐENOST PROPISA S EVROPSKIM ZAKONODAVSTVOM

Prilikom izrade prijedloga navedenog zakona, Federalno ministarstvo pravde je imalo u vidu Uredbu o Uredu Vlade Federacije BiH za zakonodavstvo i usklađenost s propisima Evropske unije („Službene novine Federacije BiH“, br. 26/20 i 76/20) i Uredbu o postupku usklađivanja zakonodavstva Federacije BiH s pravnom stečevinom Evropske unije („Službene novine Federacije BiH“, broj 98/16) i u tom smislu je izvršilo analizu evropske pravne stečevine. Nakon detaljne i sveobuhvatne analize, zaključeno je da ne postoje primarni niti sekundarni izvori evropskog prava koji regulišu predmetnu materiju. Ovo naročito ako se ima u vidu da se vrši

intervencija u navedeni zakon ponajviše u dijelu koji je tretiran odlukom Ustavnog suda Bosne i Hercegovine. Imajući u vidu naprijed navedeno, obrađivač navedenog zakona nije u mogućnosti dostaviti tablicu usklađenosti.

IV. OBRAZLOŽENJE PREDLOŽENIH ZAKONSKIH RJEŠENJA

Članom 1. Prijedloga zakona vrši se dopuna u članu 1. Zakona o plaćama i drugim naknadama sudija i tužilaca u Federaciji Bosne i Hercegovine na način da se plaće, naknade i druga materijalna prava pored sudija, tužilaca i stručnih saradnika u općinskim sudovima u Federaciji Bosne i Hercegovine, koje imenuje Visoko sudske i tužilačko vijeće Bosne i Hercegovine, utvrđuju i za stručne sudske savjetnike u Vrhovnom sudu Federacije Bosne i Hercegovine i stručne savjetnike u Federalnom tužilaštvu Federacije Bosne i Hercegovine.

Članom 2. Prijedloga zakona, odnosno novim članom 3a. u stavu (1) utvrđena je osnovna mjesečna plaća za stručne sudske savjetnike u Vrhovnom sudu Federacije BiH i stručne savjetnike u Federalnom tužilaštvu u iznosu od 2.496 KM.

Stavom (2) ovog člana propisuje se da broj stručnih savjetnika određuju predsjednik Vrhovnog suda Federacije BiH i glavni tužilac Federalnog tužilaštva, uz saglasnost federalnog ministra pravde.

Odredbama čl. 3., 4. i 5. Prijedloga zakona vrši se pravno - tehničko usklađivanje na način da se u određenim odredbama zakona dodaju stručni sudske savjetnici u Vrhovnom sudu Federacije BiH i sudske savjetnici u Federalnom tužilaštvu Federacije BiH.

Članom 6. Prijedloga zakona propisano je da će se za stručne sudske savjetnike u Vrhovnom sudu Federacije BiH i sudske savjetnike u Federalnom tužilaštvu usklađivanje osnovne mjesečne plaće iz člana 6. važećeg zakona, početi izračunavati uz primjenu korekcije od naredne godine od stupanja na snagu ovog zakona, bez obračunavanja prethodnih akumulacija.

Članom 7. Prijedloga zakona predviđeno je da će zakon stupiti na snagu osmog dana od dana objavljivanja u „Službenim novinama Federacije BiH“.

V. FINANSIJSKA SREDSTVA

Obzirom da je planirano povećanje mjesečne neto plaće državnim službenicima u 2025. godini, što je obuhvaćeno ovim zakonom, a cijeneći činjenicu da će se usklađivanje osnovne mjesečne plaće iz člana 6. Zakona o plaćama i drugim naknadama sudija i tužilaca u Federaciji Bosne i Hercegovine za stručne sudske savjetnike u Vrhovnom sudu Federacije BiH i stručne savjetnike u Federalnom tužilaštvu Federacije BiH početi izračunavati uz primjenu korekcije od naredne godine od stupanja na snagu Zakona o izmjenama i dopunama Zakona o plaćama i drugim naknadama sudija i tužilaca u Federaciji Bosne i Hercegovine, ekonomski učinak je neutralan.

TEKST ODREDABA ZAKONA KOJE SE MIJENJAJU I DOPUNJUJU

Član 1. Okvir Zakona

Ovim zakonom utvrđuju se plaće, naknade i druga materijalna prava sudija, tužilaca i stručnih saradnika u Federaciji Bosne i Hercegovine.

Član 5. Dodatak na radni staž

Osnovna mjesečna plaća svakog sudije i tužioca iz člana 2. odnosno 3. ovog zakona i stručnog saradnika iz člana 4. povećava se za 0,5% za svaku punu godinu radnog staža, najviše do 40 godina.

Član 6. Regulisanje osnovne mjesečne plaće

1. Plaće propisane članom 2., 3. i 4. ovog zakona neće se povećavati sve dok prosječna mjesečna neto plaća u Bosni i Hercegovini izračunata za kalendarsku godinu ne dostigne ili ne pređe iznos od 800 KM.
2. Počevši od godine koja uslijedi nakon godine u kojoj prosječna mjesečna neto plaća u Bosni i Hercegovini izračunata za kalendarsku godinu po prvi put dostigne ili pređe iznos od 800 KM, osnovna mjesečna plaća sudija i tužilaca i stručnih saradnika propisana članom 2., 3. odnosno 4. će se godišnje korigovati za procenat povećanja prosječne mjesečne neto plaće u Bosni i Hercegovini.
3. Procenat povećanja iz stava 2. ovog člana izračunat će se tako što će se uporediti prosječna mjesečna neto plaća u Bosni i Hercegovini za kalendarsku godinu sa prosječnom mjesečnom neto plaćom u Bosni i Hercegovini iz prethodne kalendarske godine.
4. U slučaju da se u nekoj godini prosječna mjesečna neto plaća u Bosni i Hercegovini izračunata za kalendarsku godinu smanji, osnovna mjesečna plaća sudija, tužilaca i stručnih saradnika iz člana 4. ovog zakona ostaje ista i neće se ponovo povećavati sve dok prosječna mjesečna neto plaća u Bosni i Hercegovini izračunata za kalendarsku godinu ne dostigne najviši nivo od prvog povećanja plaća u skladu sa stavom 2. ovog člana. Nakon toga, plaće sudija, tužilaca i stručnih saradnika iz člana 4. ovog zakona se povećavaju u skladu sa stavom 2. ovog člana.
5. Prosječna mjesečna neto plaća za kalendarsku godinu bit će ona plaća koja bude objavljena od strane Agencije za statistiku Bosne i Hercegovine.

Član 6a. Naknada za ishranu tokom rada

Sudija, tužilac i stručni saradnik imaju pravo na novčanu naknadu za ishranu u toku rada (topli obrok), u visini 1% prosječne neto plaće isplaćene u Federaciji po zadnjem statističkom podatku.

Član 6b. Naknada za prevoz na posao i s posla

Sudiji, tužiocu i stručnom saradniku kome nije organizovan službeni prevoz na posao i s posla,

a čije je mjesto stanovanja od mjesta rada udaljeno najmanje 2 km, pripada naknada za troškove prevoza u visini mjesečne karte gradskog, prigradskog i međugradskog prometa.

U međugradski promet spadaju mjesta koja su udaljena od mjesta rada do 70 km.

Član 6c.

Naknada za prekovremeni rad, rad u neradne dane, noćni rad i rad u dane državnih praznika

U slučaju prekovremenog rada, rada u neradne dane, noćnog rada ili rada u dane državnih praznika, sudija, tužilac i stručni saradnik imaju pravo na naknadu osnovne plaće, razmjerno vremenu trajanja tog rada, uvećanom za postotak utvrđen Kolektivnim ugovorom.

Visina naknade i uvjeti za ostvarivanje naknade utvrdit će se aktom Vlade Federacije Bosne i Hercegovine.

Obračun naknade iz stava 1. ovog člana vrši se od osnovne plaće bez dijela plaće po osnovu penzionog staža. Naknada iz ovog člana čini sastavni dio plaće.

Član 6d.

(Naknada za odvojeni život od porodice i smještaj u mjestu rada)

Sudije, tužioci i stručni saradnici iz člana 4. ovoga zakona čije je mjesto prebivališta udaljeno više od 70 kilometara od mjesta suda i tužilaštva u kojemu obavljaju dužnost imaju pravo na naknadu troškova za odvojen život od porodice i naknadu troškova smještaja u mjestu rada čiju visinu će posebnim propisom utvrditi Vlada Federacije Bosne i Hercegovine za Vrhovni sud Federacije Bosne i Hercegovine i Federalno tužilaštvo, a nadležne vlade kantona za općinske sudove, kantonalne sudove i kantonalna tužilaštva.

Član 7.

Radno vrijeme

1. Broj radnih sati za sudije, tužioce i stručne saradnike iz člana 4. ovog zakona je 40 radnih sati nedeljno.
2. Ukoliko sudija, tužilac ili stručni saradnik iz člana 4. ovog zakona radi pola radnog vremena u skladu s posebnim zakonom ili propisima, osnovna mjesečna plaća iz člana 2. odnosno 3. ovog zakona, korigovat će se u skladu sa brojem odrađenih dana u odnosu prema broju redovnih radnih dana za taj mjesec.

Član 8.

Plaćeni godišnji odmor i odsustvo za zadovoljenje vjerskih potreba

1. Sudije, tužioci i stručni saradnici iz člana 4. ovog zakona imaju pravo na plaćeni godišnji odmor u trajanju od 30 dana.
2. Pored prava na godišnji odmor definisanog u stavu 1. ovog člana, sudije, tužioci i stručni saradnici iz člana 4. ovog zakona imaju pravo na dva plaćena i dva neplaćena dana odmora godišnje za zadovoljenje vjerskih potreba.
3. Sve sudije i tužioci imaju pravo na neto naknadu za godišnji odmor u iznosu od 50% osnovne mjesečne plaće iz tačke a) člana 2. odnosno tačke a) člana 3. ovog zakona. Stručni saradnici iz člana 4. ovog zakona imaju prvo na neto naknadu za godišnji odmor u iznosu od 50% njihove plaće utvrđene u stavu 1. člana 4.

4. Neto naknada za godišnji odmor iz stava 3. ovog člana plaća se kao dodatak na redovnu plaću u julu svake godine, bez obzira na to kada se uzima godišnji odmor.
5. Plaćeni godišnji odmor za svakog sudiju, tužioca i stručnog saradnika iz člana 4. ovog zakona bit će regulisan planom godišnjih odmora koji će odrediti predsjednik suda ili glavni tužilac na godišnjoj bazi u skladu sa propisima o unutrašnjem poslovanju predmetnog suda odnosno tužilaštva.

Član 9. Vanredno plaćeno odsustvo

Pored godišnjeg odmora i odsustva za zadovoljavanje religijskih potreba regulisanog članom 8. ovog zakona, sudije, tužioci i stručni saradnici iz člana 4. ovog zakona imaju pravo na sedam plaćenih dana odmora u kalendarskoj godini kako slijedi:

- a) U slučaju ženidbe/udaje: 5 dana.
- b) U slučaju smrti bliskog srodnika (supružnika, partnera, majke, oca, očuha, maćehe, djeteta, pastorka/pastorke, brata, sestre, polubrata, polusestre): 3 dana.
- c) U slučaju smrti manje bliskog srodnika (dede, bake ili bliskog srodnika bračnog druga ili partnera): 1 dan.
- d) U slučaju rođenja djeteta: 2 dana.
- e) U slučaju selidbe iz stalnog prebivališta u drugo prebivalište: 1 dan.

Član 11. Otpremnina

Sudija, tužilac i stručni saradnik imaju pravo na otpremninu pri odlasku u penziju u visini svojih pet ostvarenih prosječnih neto plaća isplaćenih u prethodnih pet mjeseci.

Član 12a. Naknada za porodijski dopust

Sudija, tužilac i stručni saradnik za vrijeme porodijskog dopusta imaju pravo na naknadu plaće prema propisima kantona kojim se uređuje ova oblast, prema mjestu uplate doprinosa s tim da razlika do visine pune plaće se uplaćuje iz budžeta kojim se finansira rad suda, odnosno tužilaštva u kojem se sudija, tužilac i stručni saradnik nalaze u radnom odnosu.

Član 13. Penzijsko i invalidsko osiguranje

Sudije, tužioci i stručni saradnici iz člana 4. ovog zakona imaju pravo na penzijsko i invalidsko osiguranje u skladu s važećim Zakonom o penzijskom i invalidskom osiguranju u Federaciji Bosne i Hercegovine.

Član 13a. Naknada za slučaj povrede na radu, teške bolesti i invalidnosti

U slučaju povrede na radu, teške bolesti ili invalidnosti sudije ili tužioca ili stručnog saradnika ili člana njegove uže porodice isplaćuje se jednokratna novčana pomoć u visini od dvije prosječne neto plaće isplaćene u Federaciji prema zadnjem objavljenom statističkom podatku.

Član 13b. Naknada za slučaj smrti i pravo na osiguranje od posljedica nesretnog slučaja

U slučaju smrti sudije, tužioca i stručnog saradnika, njegovoj porodici se isplaćuju troškovi

sahrane u visini od četiri prosječne neto plaće isplaćene u Federaciji prema zadnjem objavljenom statističkom podatku.

Članom uže porodice sudije ili tužioca ili stručnog saradnika, u smislu stava 1. ovog člana smatraju se bračni i vanbračni drug ako žive u zajedničkom domaćinstvu, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina, odnosno do 26 godina starosti ako se nalaze na redovnom školovanju i nisu u radnom odnosu, a djeca nesposobna za rad bez obzira na starosnu dob), roditelji (otac, majka, očuh, maćeha i usvojioци) pod uvjetom da žive u zajedničkom domaćinstvu sa sudijom, tužiocem i stručnim saradnikom, braća i sestre bez roditelja do 18, odnosno do 26 godina starosti ako se nalaze na redovnom školovanju i nemaju drugih prihoda već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, pod uvjetom da s njima živi u zajedničkom domaćinstvu i unučad ako nemaju roditelja i žive u zajedničkom domaćinstvu sa sudijom, tužiocem i stručnim saradnikom.

Naknada iz stava 1. ovog člana isplaćuje se i u slučaju smrti člana uže porodice sudije, tužioca ili stručnog saradnika.

Ukoliko u istom sudu ili tužilaštvu rade dva ili više članova porodice, troškovi sahrane iz stava (1) ovog člana se isplaćuju samo jednom zaposlenom članu porodice.

Sudija, tužilac i stručni saradnik imaju pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa u sudu, odnosno tužilaštvu.

Visina osiguranja po ovoj osnovi određuje se prema polici osiguranja od posljedica nesretnog slučaja odnosno polici osiguranja od prirodne smrti.

Ugovor o osiguranju sa odgovarajućom osiguravajućom kućom zaključuje rukovodilac suda, odnosno tužilaštva za sve sudije, tužioce i stručne saradnike zaposlene u tom organu u skladu sa Kolektivnim ugovorom.

Član 14.

Naknada za putne troškove

Sudije, tužioci i stručni saradnici iz člana 4. ovog zakona imaju pravo na naknadu za putne troškove u skladu sa propisima o unutrašnjem poslovanju suda ili tužilaštva i odobrenim budžetom suda odnosno tužilaštva.

Član 15.

Naknada za troškove edukacije

Sudije, tužioci i stručni saradnici iz člana 4. ovog zakona imaju pravo na naknadu za troškove nastale u toku edukacije u skladu sa propisima o unutrašnjem poslovanju suda ili tužilaštva i odobrenim budžetom suda odnosno tužilaštva.